



Cumün da vaschins Zernez

Protocol

Radunanza da vaschins da venderdi, als 10 lügl 2020, a las 20.00, i'l auditori dal center dal Parc Naziunal Svizzer a Zernez

Preschaints: 18 vaschinas e vaschins cun dret da vuschar

S-chüsats: Fabian Schorta e Trudi Clavuot

Tractandas:

1. **Salüd e bivgnaint**
 2. **Tscherna da duos scrutinaduors**
 3. **Protocol da la radunanza da vaschins dals 18 december 2019**
 4. **Approvaziun dal quint dal cumün da vaschins da Zernez pel 2019**
 5. **Contrat da dret da fabrica per chamonnas d'aviöls**
 6. **Natüralisaziuns**
 7. **Orientaziuns e varia**
-

1. Salüd

Il president salüda la radunanza e giavüscha la buna saira. El constatescha cha la bannida es ida oura per temp sco üsità e cha la radunanza es abla da decider. El preschainta la glista da tractandas e lascha approvar quella da la radunanza.

2. Tscherna da duos scrutinaduors

I basta cun ün scrutinadur e sco tal vain tschernü Schimun Grass

3. Protocol da la radunanza dals 18 december 2019

Il protocol es stat expost illas assas nairas e sülla pagina d'internet dal cumün. El vain approvà sainza discussiun.

4. Approvaziun dal quint dal cumün da vaschins da Zernez pel 2019

Rendaquint 2019: Il president declera cha adonta cha'ls vaschins da Zernez surlaschan las entradas e las sortidas e lur possess al usufrüt dal cumün politic, pretenda l'uffizi chantunal da cumüns ün quint separà pels vaschins. Insembel cul contabel dal cumün politic ed ils respunsabels da l'uffizi da cumüns as vaiva l'on passà chattà ün model da quint chi cuntainta a las ledschas ed instanzas superiuras.

Il quint 2019 ha uossa da gnir fat bun da la radunanza. Il president preschainta il quint cun tuot seis detagls e sta a disposiziun per eventualas dumondas cha la radunanza però nun ha il bsögn da far, davo la preschantaziun fich detagliada.

Rapport da revisiun: Ils revisuors han revais il quint e Christa Pinggera prelegia il rapport dals revisuors.

La radunanza approva il quint cun ün bilantsch da 13'802.90 francs, cun unanimità da vuschs e dà dis-charg a tuot ils organs respunsabels.

5. Contrat da dret da fabrica per chamonnas d'aviöls

Il president preschainta la fatschenda. Avant raduond duos ons ha Bettina Duschletta-Godly inoltrà üna dumonda per pudair fabricar in Barlas-ch a Brail sün terrain dal cumün da vaschins üna chamonna d'aviöls. Fingìà avant vaiva Martina Peretti-Müller cumprà in Sur Mottas a Susch üna chamonna d'aviöls chi tras la cumprita nu vaiva plü ingün dret da fabrica valabel. Intant cha per la chamonna a Brail ha stuvü gnir fatta la procedura da premiss da fabrica dadour las zonas da fabrica, ha il cumün da vaschins insembel cul cumün politic sviluppà ün contrat da dret da fabrica per quistas chamonnas, ma eir per tuot las ulteriuras chamonnas privatas cun dret da fabrica sül terrain dal cumün da vaschins.

Uossa es il contrat pront e la varianta per las chamonnas d'aviöls vain preschantada. Per tuottas duos chamonnas vain fat il listess contrat cun üna limitaziun d'adöver restretta sül'apicultura chi ha üna dürada da 30 ons cun pussibilità da prolungaziun.

La radunanza ha approvà cun unanimità da vuschs ils duos contrats sco preschantats.

6. Natüralisaziuns

Duonna Maria Teresa Furtado de Magalhaes chi'd es possessura e maina l'hotel Selva a Zernez e sia figlia, duonna Alessia Magalhaes Do Nascimento, han fat la dumonda per dvantar vaschinas da Zernez. L'intera procedura da dumonda cumpiglia il prüm üna examinaziun da las actas e la documainta, cha ellas han stuvü inoltrar per far la dumonda, tras il chantun ed il cumün da vaschins. Lura ha il cumün da vaschins gnü dad invidar a las duonnas ad ün discuors, dürant il qual i vain fat üna examinaziun da lur savair sur da la Confederaziun Svizra, il Chantun Grischun, nossa regiun ed il cumün da Zernez. Davo ch'ellas han frequentà quel cun success, propuona la suprastanza da vaschins cun unanimità da vuschs dad aderir a la dumonda e dar il dret da vaschinadi da Zernez.

Il president da vaschins, Rico Zala, preschainta las duos duonnas a la radunanza e manzuna ils motivs ch'ellas han nomnà per lur dumonda. Duonna Maria Teresa es fingìà plü lönch a Zernez co ch'ella ha passantà in seis pajais d'origen ed ella ha daplüs da seis confamiliars in Svizra co in Portugal. Duonna Alessia es nada e creschüda sü in Engiadina, per gronda part a Zernez.

La radunanza ha decis cun unanimità da vuschs dad aderir a las duos dumondas da natüralisaziun.

7. Orientaziuns e Varia

Il president da vaschins, Rico Zala, orientescha a la radunanza sur dad oters affars dal cumün da vaschins:

- l'rom da las natüralisaziuns simplifichadas ha il cumün da vaschins per üna vouta pudü tour in cogniziun duos natüralisaziuns da personas chi han propcha eir üna relaziun cun nos cumün. Üna d'ellas abita a Susch e l'otra visitescha qua o là a seis sör chi abita a Susch.
- Ils contrats da servitut cha l'ultima radunanza da vaschins ha approvà arreguard la Chamonna Grialetsch sun inscrits e valabels.
- L'uffizi da natüra ed ambiaint dal chantun Grischun ha orientà chi ston gnir fattas masüraziuns ed eventualmaing eir üna sanaziun da las deponias da rument chi sun sepulidas sper l'En in Sfuondrà a Zernez.

Suot vaira ha il president da vaschins pudü respunder sün üna dumonda da sar Nuot Filli, arreguard la natüralisaziun in connex cul vaschinadi svizzer. I dà be vaschins

svizzers chi han eir ün dret da vaschinadi in ün cumün svizzer. Burgais svizzers chi nun han ingün cumün da vaschinadi nu saja. Fritz Felix ha dumandà chenüna expressiun chi saja la valabla ed uffiziala «Corporaziun da vaschins» o «Cumün da vaschins». Il president ha orientà cha la versiun «Cumün da vaschins» saja la valabla l'otra vain dovrada per part our d'adüs, ma nun es la versiun uffiziala.

La radunanza po gnir serrada a las 20.32

Il president:

Rico Zala

L'actuar:

Hermann Thom